


KISITA HÉLA PAMO

KISITA NTĒNGO

 Ulwēne lo nalōlilōli lusako ukugomokela ku kipānga, ulubunju ulu. Une nguswiga itolo... Nkundwe Neville āyobīle ukuti bīngi bakābagīle ukupilika ku nyuma. Ngima umwe mubagile ukumbilika une naloli kanunu lilino, kunyuma uko? Ngimba kyōsa kanunu? Umma ndaga. Une ne—une ndi nnini, popāpo une ngufimbilisigwa ukutēndéka unjwēgo mwīngi ukuti abāndu bamanye ukuti ndipo.

² Popāpo, une ngukūmbukila akabalilo kamo akabalilo kāko une nābōmbāga ku Public Utilities. Une ngwisa pa lifyūkilo... Kangi une nālīsibīle ukufwāla ifilato ifikulumba ifinywāmu, nimisumali mu fyēne, panongwa ya kwēnda mu ngoye isyapamwanya. Kangi une nīsāga pamwanya pa mafyūkilo. Kangi Nka. Ehalt, uyu yo mwīnangu gwa une, āli pa bukosityelo bwa nyēsi. Une nsisimikisye Tata. Ginther pala abagile ukummwagania umwene, kanunu itolo. Popapo Edith alinkuti, “Billy, ugwe kutendeka unjwego unkinde, ukuya mwinitu unnini bo ulu, uyu une ngetilemo siku.” Ngwikanyanga mu misumali iminywamu igi, ngufyuka pa mafyukilo.

³ Une ndinkuti, “Ena, Edith, une ndinnīni fiyo, une ngufimbilisigwa ukufumusya kwa aligwēsa ukuti amenye une ndipo, ukutēndéka unjwego gu mwīngi.”

⁴ Ena, une ndinkubuka itolo mula ku bukōlélo. Nkundwe Neville ātalīle ālimbūlīle une ukuti umwīnitu unnūnu, Nkundwe Roy Roberson, ukuya asōkilépo ukufuma ku kipanga ulubunju ulu, panongwa ya kuya mbine. Iyāke... Umwēne āli ni līno ilyakubīkāpo. Ilyēne litēndīke ubutāne, kangi limpéle i sekema yimo. Kangi umwēne abūkile ukuti bakalinyukule ilyēne, une ngwīnogóna, nakalinga itolo. Kangi Roy āli ngati yo tāta kuli uswe apa, kangi uswe tungānile umwēne. Kangi une ndinkuti, “Nkundwe Roy, une—une ngubuka kanti lilino, itolo ntumaminiti utunandi, ku kipānga.” Une ndinkuti, “Une ngusumaga ku kipānga ukuti uswe tukwakukusumilaga ugwe, ulubunju ulu,” kangi kilābo akabalilo kāko umwēne ikubūka kula, ukuti iki bakakipākisye. Ilīno lila likulīle mbuniōngale, pamo ikindukimo kibīkigwépo mbusóbi, kangi abēne bikufimbilisigwa ukutumula ilyēne nukusōsyāpo, kangi ukwēga ilyēne pānja.

⁵ Nkundwe Roy yo mfumakubwīte, bo mūmo umwe mwēsa mukumanya, ukufuma ku Bwīte Bwākīsu Bwākībīli, uyu yo itolo atusulīlgwe ku tupatu. Kangi linga ukwēne kukāli

nongwa ya bununu bwa Kyāla, umwēne āngali akaya nu būmi. Umwēne ālambalikīgwe pānja pakati pa bafwe, pa kabalilo katali; ingongi sipufulīgwe mōsa nkati mula, kangī amalundi gapufulīgwe, kangī indepa ingulumba syosa-sibili sigogīgwe. Kangī u ngānga alinkuti, “Linga umwene ālimo nu būmi siku, umwēne atisakwēndāmo siku ni likato limo.” Mu lipyāna lya Kyāla, umwēne ikubōmba imbombo ilisiku lililyōsa, ukufyūka na filifyōsa. Kyāla āli nnūnu ku mwēne panongwa yakuti umwēne yo mundu nnūnu, kangī uswe tunganile umwēne. Kangī uswe, uswe tuli—uswe tukaya twesa . . .

⁶ Linga uswe tukwitugala kanunu, ikyo kitukusanusya ukuti uswe tuponile ukufuma ku ndamyō. Nubwanalōli bosa, ikyēne kikusanusya ukuti indamyō sitalulīgwe kubwakumyītu. “Kabuno nyīngi syo ingubilwo sya bagolofu, lōli Kyāla ikumponesya umwēne ukufuma ku syōsa isyēne.” Ikyo kyo kiyabo ikimogi.

⁷ Popāpo uswe tukuyaga pakusūmāga itolo ulwīputo lwapalubafu ulubunju ulu, panongwa ya Nkundwe Roy. Une nguswīga linga balipo balibosa nkati muno, pōpe, babagile ukulōnda ukwīputililīgwa, babagile ukulōnda ukukumbukilīgwa mu lisyu lya lwīputo? Linga abēne itolo babagile ukufyusya amaboko gābo. Popāpo. Ikyo kyo kinunu. Unko uswe itolo twīme akabalilo, linga umwe mubagile, akabalilo kako uswe tukusuma.

⁸ Ntwa, uswe tukwisa umwisyugu, ku bwandilo bwa sabata. Kangī ilisuba likwēga itolo injila yāke lilino, ukupululuka ukukilania ikisu, ukutwāla ubwēlu kangu ubūmi ku findu fila ifi ilyēne lyābikīgwe ukubōmbela lūlo. Kangī kubwāndilo bwa lukomano, iki uswe tuli kiyabo kya Kipānga Kyāko, iki kikōlēlīgwe ukuya nakyō pānja ulukomano lwa lubumbulusyo, ukubūmbulusya kwamumbili ukwa mbili, ukufwānisya ukufūmbwa ni finyonywo ifya nsayigwa gwītu Ntwa Yūyo āfulasīgwe panongwa ya ngilano syītu, kangī ni fulale Syake uswe twabumbulusigwe, kangī uswe tubagile ukusuma, ku bwāndilo bwa lukomano, bo ulwēne lukwānda ukwēga amapiko gāke, mu nyīmbo, kangī indumbula syītu sikwānda ukufyūkisīgwa mmwanya, ukuti uswe tubagile ukukumbukila, ulubunju ulu, Ntwa, umpala gwītu, ugwantēngo nkundwe, Roy Roberson, ugwāmbombo Gwāko umwiyūfyē. Kangī uswe tumenye ukuti Ugwe gwākyūngile ubūmi bwāke ba ngunda gwākulwīla, kangī Ugwe uli nnunu ku mwēne. Kangī umwīsyūgu umwēne ikukubilwa ni bukubilwe, mpaka umwēne akābagile ukwīsa ku kipanga.

⁹ Kangī, Ntwa, akabalilo kāko abēne bīputāga mu nyumba ya Yohani Mariko, ālipo u Gwāndumi āsulwīke pāsi ukwīngila mu nyumba ya minyololo, kūko Peteri āli mbipinyīgwe, kula alinkwīgūla ififigo, mbutitumbutitu, nukundōngōsya umwēne pānja.

¹⁰ O Ntwa, Ugwe gwe ukāli Kyala. Bala a Bāndúmi bali pa bulagili Bwāko ulubunju ulu. Uswe tukusuma, Gwentwa, ukuti akabalilo kako uswe tukusuma mu nyumba ya Kyala, ukuti a Bāndúmi bisakusulukila ku nyūmba ya Nkundwe Roberson. Ikinyonywo kyāke kyo kuya pa buyo bwāke apa, lōli ubukubilwe bũnkolīle umwēne pāsi. Kangi a Bāndúmi ba Kyāla bali mponesyāga umwēne, ukumpela umwēne ukuya kanunu, ukuti umwēne abagile ukwēga u buyo bwāke ku nyumba ya Kyāla.

¹¹ Balipo abāngi bābo bafumile ukufuma mu butāmígwe, abēne—abēne bafumile ukuya babine. Kangi uswe tumbwēne unkíkúlu ugwakikāngāle, bo umwēne āli kifuki pakwītúgasya, ukufyūsya amaboko gāke, akabalilo kāko umwēne fyātanīle mmalundi gāke. Umwēne isile ku nyumba ya Kyāla, ukuti asabūmbuluke. Pāga, Ntwa, ukuti umwēne isakusōkāga pānja, ni nyībuko nu butubwa bwa nkíkúlu unkeke.

¹² Bōsa abāngi aba bafyūsīsye amaboko gābo, mingi ga gēne gabūkīle mmwanya, 'nongwa yakuti ukwēne kusimbígwe, kangi kwandisigwémwe, “Bwīngi bo bukubilwe bwa ngolofu, lōli Kyāla ikumponesya umwēne ukufuma ku fyōsa.” Uswe tuli pululukilāga mu lwītiko, ingongi sya lwītiko, ulu lwīsakutuponesyāga uswe ukufuma ku bubine nu bukubilwe bōsa. Akabalilo kāko ulukomano lumalike, apene palingaya ngapo yumo umonywa pakati pa uswe.

¹³ Tupāga, Ntwa, ukuti unsitakwitika aligwēsa ikuyaga mwitiki. Kangi bo uswe tukwigonela pa Lisyu Lyāko, u Mbepo Mwīkemo ali egaga Ilyēne nukulibīka Ilyēne mu ndumbula syītu, kangi mula lyōneléla Ilyēne mpaka Ilyēne likwīsa ukuya kipaso kya Lisyu. Bōmbāga iki kwa uswe, gwe Ntwa, akabalilo kako uswe tukwinamīsa imitu gyitu nukwiputa mu Ngamu ya Yeso. Ameni.

Umwe mubagile ukwitūgāsya.

¹⁴ Itolo bo tukāli ukwīngīla mu ndumi ya bubōmbélo ku lubūnju ulu, une ngunyonywa ukupīmba pa minogonelo gīnu, kifukipo panini. Linga balipo balibōsa ba umwe muli nu lutūsyo-pambombo, kangi mukulōnda ukwisa ku lumo lwa mbombelo isi sisakuyaga mu Middletown, Ohio, ukwānda Kilembelo, undungu gumo, ulwēne lwisakuyaga ku migunda gya kugonelako.

¹⁵ Ngimba ugwe umenye itolo ingamu ya migunda gyakugonelako, Gene? [Nkundwe Gene ikuyoba, “Bāyobile ukwēne kwāli amamailosi kalongo na mabili pānja pa Middletown.”—Nsimbi] Nkundwe Sullivan. Middletown ko kāya kanini, une ngusakīsa kifuki ngati Jeffersonville apa. Ukwēne ko buyo bwa mpila gwa mfitundu. Nkundwe Sullivan yo ntīmi kula. Aligwēsa gwa fipānga fya Full Gospel, iki kula filiko malongo-mahano-nu-kōngelélāpo fikutūnaa mu lukomano

ulu, bīsakubagilaga ukubabūla umwēne kūko imigūnda gya kugonelako gili.

¹⁶ Kangi pala pisakuyako ifitēmbē fīngi pa migunda igyākugonelāko, momūmo une mbūlīgwe, ukupākīsyā abāndu aba bikulōnda ukwīsa. Kangi i ngomano sisakwānda Kilembelo mpaka Mpyagilo, amasiku ntāndātu. Kangi lutisakuyako lumo Pandungu, panongwa ya fipānga ifīngi, ukuti abēne babagile ukubūka nukukwakuya ni ngōmano syābo isyābwīla. Lumo, kwisakuyako ingomano syabubūmbulusyo kuli ababine, ikilo kilikyōsa. Kangi aligwēsa ikubilikilīgwa. Kangi ikyo kisakwānda pa Ogasiti lya 10, ukukindilīla mpaka lya 15, Kilembelo ukukindilīla mpaka Kilembelo. Kangi linga umwe mukuyaga nu lutusyo-kumbombo, kangi—kangi ulutusyo-kumbombo lwinu lukwīsa, kangi umwe mukulōnda ukuyāta ulwēne mu njila yila, mulimosa, uswe nalōli tukusangalukāga ukuya na umwe.

¹⁷ Kangi une mbagile ukukasya bosa bala babo bakōsigwa mu lōsyō Lwakikristi, ukusyalila ulubunju ulu nukwinogona losa kangi. Kangi yaga mwitendekisye ku lukomano lwa losyo ulu lwisakukongaga mu maminiti malongo-mana-na-mahano lilino, une ngusakisya. Ikyo kisa kuyaga apa pa kipanga.

¹⁸ Uswe tuli nu lweke ukukasya abandu ukuya bosigwe mu losyo Lwakikristi, tumenye ukuti ulwene lu lukulondigwa ku bupoki. Kabuno ukwene kusimbigwe nu Ntwa gwitū, ubulagili Bwake ubwakubumalikisyo, ubulagili Bwake ubabumalikisyo ku Kipanga. Pamo, mumo Umwēne ākilagile i Kipānga, kubumalikisyo, Umwēne alinkuti, “Būka nkīsu kyōsa, kangi kalūmbilile i Nongwainunu ku kipeligwa kilikyōsa. Umwēne uyu ikwītika kangi ikōsigwa isakupokigwāga.” Popāpo uswe tumenye ikyo kyo kyakulōndigwa ukuti uswe tōsigwe ukwīsila mu kuyubikīgwa.

¹⁹ Kangi uswe tuli bahobofu ukupa ububōmbelo ubu kwa umwe, kwa aligwēsa uyu ipilikisye mu ndumbula syabo ukuti Yeso Kristi yo Mwanundumiana gwa Kyala, ukuti Umwene afwile ukupoka abatulwanongwa, kangi ugwe gwali yumo uyu Umwene aafwile ukupoka; kangi ugwe kulonda nukosigwa mu Ngamu ya Yeso Kristi ku bufyule bwa mbibi syako; kuyoba, ku kisu, ukuti ugwe kwitika ukuti imbibi syako sifyuligwe, kangi ukuti ugwe kwisa lilino ukubuka ukuya mfundigwa gwa Ntwa Yeso, ukwega ubwimo bwako.

²⁰ Linga ugwe ukuya nakyo ikipanga kyakubukako, uswe twisakuya basangalufu ukuya na ugwe ukulilanila na ugwe. Uswe tukaya na benekaya apa. Ikyene kyo kitembe ikigukano, ku Mbili gosa ugwa Kristi, ikya kipānga-kipāgūke kilikyōsa. Uswe tukwīma ngati bāpakati-papipānga. Kangi uswe tukwīgūla ififigo ku bāndu bōsa, kisita kupāsyā iki abēne bali, langi, luko, pamo kimanyisyo, aligwēsa yo mwambililigwe\.

“Aligwesa yūyo ĩganile, isaga.” Kangi ugwe ukuya ni kipānga ikingi nakimo, uswe tukuyaga bahobofu kuli ugwe itolo ukwisa nukulilanila na uswe. Kikayapo nakimo ikya kwĩngila. Itolo isaga munomuno nkati akabalilo kāko ififigo figwike, nukulilanila na uswe. Ikyo kyo kyēne ugwe kufūmbwa; itolo isaga bo lula. Isaga ni ndūmbula inyīgūke, bika ifibega fyāko pa ligudumu, kangi tutula uswe bo uswe tukugutula nkyēni panongwa ya Kitangala kya Kyāla. Kabuno, uswe nalōli tukwītika ukuti isala, bo lululu kali kifiku, ukuti akabalilo kāko ifĩndu fyōsa ifi fyayobeligwe mu i Bāngēli fisakufwanikisigwāga.

²¹ Kisita kwĩlāmwa lōli bĩngi ba umwe mwābalile isya Khrushchev, ubuyobi bwāke ku U.N., ilisiku limo, mūmo ubwēne bwālyāndisigwe kwa une ukufuma mwa kalata gwa nongwa gwa Canada, nu mwĩnāngu. Umwēne alinkuti, “Linga aliko u Kyāla yumo, Umwēne ĩtēdekĩsya ukupyāgila nukusuka mōsa i tempeli kāngi, na umwe balundikafyuma, mūmo Umwēne ābōmbile ku bwāndilo.” Polelo lilino uswe mubagile ukubala pakati pa masimbo, “Umwene ĩtēdekĩsye ukupyāgila mōsa i tempeli kangi.” Kangi kyākutilisya, u njabanafyuma ābagile ukuyoba i kĩndu bo lūla? Umwēne āli nakyo ikindukimo, palema. Uko kokutalusya. Abene bāli balundikafyuma, mu bwāndilo, aba bātēndike u lutamio. Uswe twe balundikafyuma.

²² Une nāpilike ugwĩtu umpala, unganigwa, Nkundwe Neville, ikutēndēka ubuyobelo pa senema yāke. . . pamo ubufumusye bwa rediyo, ulubūnju ulungi, ubu itolo bwābūkile ukukĩndilila nukukĩndilila, mu lĩnogonelo lyāngu. Une ngabagila itolo ukwībwa ubwēne. Une nālyāndĩsye ubwēne ku mwĩnangu gwa une, ikilo kya mmayolo. Kangi kila kyo iki, ukuti pisakuyapo. . . Ukufuma pa kusōsyāpo u Mbepo Mwikēmo, ukufuma pa kisu ubwĩputipĩti bwa kipānga ikyalwĩho bwisakukĩndililāga, kisita kumanya ubukĩndāne. Ngimba mubōmbilēmo siku, mubōmbilēmo. . . Balinga bapĩlikēmo ikyo? Ngimba ikyo kikāli kyāpamwānya? Abene bakampanya u Mbepo Mwikemo, polelo abene batisakumanya akabalilo kako Umwēne akĩndile, kangi abēne bisa itolo kukĩndilila mulamula nkyēni itolo lulalula. Akabalilo kāko ugwābumalikisyo yula afūngiligwe mu Mbili gwa Kristi, abēne bisakukĩndililāga itolo nkyēni, bikugela ukutwāla abapĩnduke ku Mwēne, panongwa yakuti abēne batikumanya iki Umwēne ali. Kangi ubwĩpĩti bwābo ubwālwiho bwisakukĩndilila itolo mūmo abēne bāyĩlile. Lilino, ikyēne lumo kikĩngila mwa umwe mūmo ikyēne kyābōmbile kwa une, lōli bula bwāli buyobi ubwāpamwānya. Ikyo, abēne bisakuyaga kubutali fiyo, itolo mu nyiho syabwĩpĩti, mpaka abēne batisakunsiyūka Mbepo Mwikemo, panongwa yakuti abēne bakampanya iki Umwēne ali, ukwānda nu kwānda.

²³ Kyāla yaga ni kisa pa uswe. Nkundwe, une ngulōnda ukwitūgāla mbūmi ubu, kangi ikinyonywo kyāngu, mpaka

linga pōpe akayabo akanini fiyo aka busulumanie Bwāke, une nisakubumanya ubwēne mu ndūmbula yāngu. Une mbagile ukubōmba ikindukimo iki kibagile ukunsulumanisa Umwēne, une mbagile ukwipilika ikyēne itolo nkabalilo kanandi.

²⁴ Bōpe, nubusitakuyapo Bwāke; une ndikulōnda ukuya apa akabalilo kāko Umwēne akayapo apa. Une ngulōnda ukuya nsōkilépo akabalilo kala, ena, nkulumba, kabuno patisakuyapo i Lilopa nalimo pa kikota kya kisa. Ukwēne kwisakuya kwāngīsi kangī kwālyōsi kangī kutītu. Kubwikémo kutisakuya nu Ndongi nayumo kula, ukulāmbila inongwa yītu akabalilo kala. Umwe mumenye i Lisimbo likuyoba ikyo? Inyumbinyikemo yafūkāga ilyōsi. Likāliko i Lilopa nalimo pa kikota kya kisa, polelo ubwēne bo bulōngi.

²⁵ Linga u Ntwa, akabalilo kamo nkabalilo kēngo ka kugwamani aka, isakutupa uswe uluyigo lwa kilo sya masiku manandi, une ndēndike ikyēne mu līnogóno lyāngu, une ngulōnda ukwēga i Būku lya Busetuli lila, ku bufūnde pa lyēne, itolo ukubūka palapala pāsi ukukīndilila i Būku lya Busetuli lila, nkyēni.

²⁶ Lilino, umwīsyūgu, une mmenye ukuti balipo bīngi bikwīsa muno, ukwīputilīgwa. Kangi mbubombela-mbombo mwāngu mwāligwalilīgwe umwīsyūgu, pamo undungu ugu. Kangi bamo mwa bāndu bālīngile nkati, bakālwāgile ulusako ukwīputilīgwa, panja pala, panongwa yakuti abalumiāna basōkilépo, ku lisiku limo pamo mīngipo, ukutūsyā. Abēne bāli ni mbombo nyīngi fiyo ukubōmba; imbombo yābo bēne, ukongelēlāpo imbombo ya kipānga, ni mbilikilo sya fōni na filifyōsa. Ikyēne nakalinga itolo kikutwāla ugwe mu lutēnde lwāko. Kangi popāpo polelo iyo yo nōngwa. Une mmenye une ngufimbilisīgwa ukusōka pānja kubuyobumo, kamokēne nkabalilo, nukubōmba ikindukimo ikikīndāne, kangī une mmenye abēne bikulōndīgwa, bōpe. Popāpo, abēne bālīmbilikile une. Une ndinkuti, “Une ngwīnogōna ikyēne kikuyaga kanunu.” Kangi uswe tukuyaga pakwīputīla ababine, nkabalilo kanandi.

²⁷ Kangi une ninogonaga ukuti uswe tubagile ukubala ukufuma ku Lisyu lya Kyala. Linga umwe muli nago a Mabāngēli gīnu lilino, unko uswe tusanukile ku Būku gwa Yesaya. Une nkiganile ukubabona umwe mukwēga u Būku gwīnu nukubala Ilyēne. Une ngubala. . . Linga umwe kisitakukīnda itolo limo pamo mabili a Masyu, tāsi, Ilyēne lyo Lyāsyēpwa, Lisitakubola Lisyu lya Kyāla. Ilyēne likabagila ukumalikāmo siku. Untu gwa 55 gwa Yesaya, untu, “Ubupoki ubusitakumalikāmo.”

Hee, aligwēsa uyu ali ni kyūmilwa, isaga ugwe ku mīsi, kangī umwēne yūyo akaya nayo i hela; isaga ugwe, ulaga, nu kulya; ena, isaga, ulaga ubwālwā bwa māfilu. . . ulupyu kisita hela kangī kisita ntēngo.

Nongwa ya fiki ngimba ugwe kutāga i hela kuli iki kīkyo kīkaya nkati? kangī ubusukuliko bwāko kuli iki

kikyo kitikwikutísya mma? pilikisya kanunu kwa une, kangi ilya ugwe kila iki kyo kinunu, kangi unko umoyo gwāko gwīkyēle bwēne mu butupe.

Tegaga imbulukutu yāko, kangi isaga kwa une: pilikisya kangi umoyo gwāko gwisakuya mūmi; kangi une nisakutēdeka ulwītikáno ulusitakumalika na ugwe, kōpe ni fisa ifyanalolīli fya Davidi.

28 Une ngulōnda ukuyoba kwa umwe, itolo utubalilo tunāndi, pa ntu: *Kisita Héla Pamo Kisita Ntēngo.*

29 Filipo findu fingi fiyo ifyakunosya mmasiku gītu. Filipo fīngi fiyo ukubasōnga abāndu ku iki uswe tukubilikila “ifyakusangulusya,” kangi ikyēne kyo kya kwa bāndu bōsa, ingulilo syōsa.

30 Filipo ifyaluhaho ku bāndu abakeke, ifimogo fyamwīsyūgu ni sekelo sya tiona-bunguluka, kangi ubwīmbilo ubu abēne bali nako ubu bukubūka ni kyēne. Kangi ikyēne kyo kyōsa kyaluhaho, panongwa ya kunosya.

31 Une ndikupānya kali ko kāya kanunu nki u mwāna akulilémo, na mūmo akēne kamanysisigwe ukubōmba indalusye; linga u mwāna yula akītikisya ubwisibile bwa Bupāpīgwe ubupya, ubwīmbilo bwa tiona-bunguluka bukukola ubutegambulukutu bwāke itolo nakalinga palapala umwēne ikupilika ubwēne. Panongwa yakuti, mwa umwēne, mupāpīgwe mwa umwēne, ukwisila mu kipeligwa, umbepo gwamumbili. Kangi a maka ga mōhēsi go makalumba fiyo, umwīsyūgu, mpaka gakukola umbepo gwa kanini kala.

32 Kangi bo bwingi buki agēne gisakubōmba ku bakusi, polelo, aba bapikile u Bupāpigwe ubupya! Panongwa yakuti, pene pāpo ubūmi bwāko bwāndulīgwe, kangi ugwe upindusigwe nukupāpigwa mbupya, mu Kitāngalala kya Kyāla, ubupeligwa bwako pōpe bwisakuyaga bwa findu fya nkisu, kali ugwe gwe mwīputipūti bulebule, pene pāpo kila kyāndulīgwe mwa ugwe. Ugwe ubagile ukutufya kangi ukuya mwīputi, lōli pōpe ikyo kisakuyaga nu luko lumo lwa maka gakukwābila nyuma kwa ugwe, panongwa yakuti u nnyāmbala ugwaiyolo ugwa butulwanongwa ni finyonywo fyāke akafwa mma mwa ugwe tāsi.

33 Lōli akabalilo kāko ugwe kundeka Kristi ege ikikota mu ndumbula yāko, ifindu fila fitikutamia mma. Ikyēne kyo kikulumbapo nu bwīngi fiyo.

34 Une ngabagila ukuyoba ingamu ya nnyāmbāla uyu, ’nongwa yakuti une ngabagila ukwinogóna isya ngamu yāke lilino, lōli mwe bīngi ba umwe mukunkumbukila umwēne. Abēne bikuyoba kula kwāliko akasūngo kūko fikuti abanyāmbāla bābūkāga, ukwībillila, kangi abakīkūlu bīsaga pānja, bikwimba. Kangi inyīmbo syābo syāli syakunosya fiyo, mpaka abēndesya-sitima bikukīsania, mu sitima, bīsāga mula. Kangi polelo

abasikali bakwībīlila ba—ba kamataga abendesya-sitima aba kisita kwitendekesya, nukubagoga abēne. Kangi u nnyāmbāla unkulumba yumo ālonidaga ukwēndeláko. Kangi umwēne āli na bendesya-sitima bāke ukumpinya umwēne ku liyēngo lya kyēnda-mbepo, kangi—kangi—kangi balinkubīka ikindukimo nkanwa kāke, ukuti umwēne alingakūtága; kangi—kangi balinkubīka ifyākwiǵála mu mbulukutu sya bēndesya-sitima, ukuti abēne bakābagile ukupilika, nukwēndeláko, ukupilika ulwēne. Kangi abakíkūlu balinkusōka pānja, bikumoga kangi—kangi ukuywēga, kangi ukwīmba, kangi, o, icyēne kyāli kikulumba fiyo, mpaka umwēne alinkusyūmbutusya ikipapa pa ngōngi syāke, ukukūta ku bēndesya-sitima bāke, “Syumbutukila mula! Syumbutukila mula!” Lōli abēne balinkutoligwa ukumpilika umwēne, abēne bāli ni fikanyi mu mbulukutu syābo.

³⁵ Kangi polelo umwēne alinkwēnda ukubūka ku buyo bumo kūko abēne bayaga pakwābula icyēnda-mbepo iyāke, pamo, ukwābula amaboko gāke, kangi umwēne āyaga pakusōsyāmo ifikanyi mu mbulukutu syābo. Pala, bo ikwēnda pa ngīndi, umwēne āpilike ugwanyimbo uyu āli patali gwapamwanya fiyo ukukīnda lula lwāli pāsi pala, mwakuti bo umwēne ikukīsanja kangi, abēne balinkuti, “O, gwe nkulumba mwendendeki, ngimba uswe tukupinye ugwe ku liyēngo lya kyēnda-mbepo kangi?”

³⁶ Umwēne alinkuti, “Umma, ndeka une itolo njemwābūke. Une mbilike ikindukimo ikikulumbapo ukukinda fiyo, mpaka ikyo kitisakundamiāmo une siku kangi mma.”

³⁷ Iyo yo njila icyene kiyīlile ku Nkristi umpāpīgwe-ka-kibili. Abēne bākyāgile ikindukimo fiyo nubwīngi kikulumbapo ukukīnda aba tianga-bunguluka kangi ifyakwikyēla fya kīsu iki. Abēne bikukyēlisigwa nu Mbepo Mwīkēmo. Umwēne yo nkulumbapo nu bwīngi fiyo, mpala i kīsu kyo kifwāno ku bēne.

³⁸ Lōli akabalilo kāko ugwe kubūka ku bunoge bwāntēngo gwāpasi ubu, ugwe ubagile ukukūmbukīla ukuti ugwe kufimbilisigwa ukwēga i hela sinyīngi. U mwīnitu unkeke uyu ikwēgēla unnine gwāke unkīkūlu ku sekelo isi ni fimogo ifi, na fyōsa bo ifyo, isakuhōmbága umfwālo gwāke unkulumba ugwa ndungu. Kangi abāndu abakusi aba bikugela ukwāga ifyakunosya mu kubūka ku filabu fyābwālwa, ukunwa ukusōsyāmo ubusulumanie bwa ndungu, abēne bikubūkága ukufimbilisigwa ukuhōmba ihela ingulumba. Kangi ngimba abēne bikwāgāmo fiki mu kyēne? Abēne batikwāgāmo nakimo lōli kukubab’untu.

³⁹ Kangi kumbulikilága, ugwe kwisakumasyaga inongwa na Kyāla ilisiku limo panongwa ya icyēne. “Kangi umfwālo gwa butulwanongwa bo bufwe.” Ugwe utikutēndēka nakimo apa pa kīsu, ukwīsila mu kyēne. Ikyēne kyo muli-muli

gwabusyōbi. Ukunwa kwisakōngeléla itolo ubusulumanie. Ubutulwanongwa bwisakōngeléla itolo ubufwe pamwanya pa bufwe. Ubumalikisyo bwāko bwisakuyaga kupāgukána na Kyála, Mwāsýepwa; ukubuka mu Sumbi gwa Moto. Kangi ugwe ukabagila ukukaba kalikosa, lōli kukutāga.

40 Polelo Kyala ikwisa kangi ikulalusya ililálusyo, “Nongwa ya fiki ugwe kuhōmba i hela yāko pa findu fiyo ifi fitikwikutísya? Nongwa ya fiku ugwe kubōmba ikyēne?”

41 Ngimba kyo kiliku iki kikumpela umūndu ukubōmba ikyēne? Abēne bikutāga kyōsa iki bali nakyo, fyosa ifi abene bikufwāla, ukūla ukunwa, ukufwika unkikulu yumo uyu abēne bikwēndendēka nagwe, pamo uluko lumo lwa fyakisu, fyakinyonywo ifisangalusyi.

42 Loli uswe tukubuligwa mu i Bāngéli, kangi tukulagililigwa ukwisa kwa Kyála, “Kangi ukūla ubuhofu Bwasyepwa kangi u Bumi Bwasyepwa, kisita héla pamo kisita ntēngo.”

43 Ifindu fila fikabagila ukwikutisya, kangi ubumalikisyo bwa ifyēne bo bufwe Bwasyepwa. Kangi ikyene kyegile ihéla syāko syōsa isi ugwe ubagile ukubūngānia palikimo, ukuya u—u nkulumba yumo pamo unsangalusi, pamo undumiana gwābusangalufu, pamo kilikyosa ugwe ubagile ukuya, pamo undindwana umfumuke, pamo kilikyosa ikyēne kili. Ikyēne kyēgile fyosa ifi ugwe ubagile ukubika palikimo, ukubōmba ikyo. Ukufwala mu bufwalilo ubwapamwanya ukukinda fiyo, kangi—kangi ukubomba ifindu ifi ikisu kikubomba, kukwisa itolo ukufūnja ubuhōmbígwa bwa kutāgígwa Kwāsýepwa.

44 Kyala alinkuti, polelo, “Fiki?” Ngimba uswe tukuyaga pakubomba fiki ku Lisiku Iya Bulongi, akabalilo kako uswe tukulalusigwamo, nongwa ya fiki uswe twabombile kila? Ngimba ilyāmulo lyitu lisakuyaga fiki? Ngimba lisakuyaga fiki ilyamulo ku Amerika gwamwisyugu, yuyo ikuyoba ukuti abene bo kikolo Kyakiristi? Kangi silipo i héla nyingipo sikutāgígwa pa bwālwa, mu kabalilo ka kyīnja, ukukinda isi silipo pa fyākulya. “Nongwa ya fiki mukulāga ihéla syīnu panongwa ya findu fya luko ulo?” Yope, isikali yibagile ukukutuma ugwe ku bufūngwa, panongwa ya madola mahano ga songo iyi ugwe gwātumile pamo ku kipānganio kimo iyi yikābīkigwe ndubātiko ulutalusye, ukutuma undumbilili ku fisu ukukilania inyanja. Uswe tukuyaga pakulālusigwa ilisiku limo, “Ngimba nongwa ya fiki ugwe gwābōmbile ikyēne?”

45 Uswe twe kikolo Kyakristi, kangi amabiliyoni gikutumígwa ku bāndu bala kwīsilya kula, ukuti uswe tukugela ukūla ubwinake bwābo. Lilino abēne bikubupika ubwēne. Yo nongwa u Khrushchev ayobile, “Linga aliko u Kyála, Umwēne isakupyāgila akāya Kāke ukuya kamogi kāngi.” Abasitakyala babagile ukutēndēka ubuyobelo bo ubo, ukutwala isoni pa

uswe. Kyo kindu kyakusekesya nki icyene kili! Kangi uswe tukwikolela twibene Bakristi.

⁴⁶ Kyala ayobile, “Isaga, ulaga u Būmi Bwāsyèpwa, kisita héla, kisita nténgo.” Būmi, ukuya mūmi kwabwilanabwila, kangi uswe tukusanusya inyuma syītu pa Kyēne nukuseka mu kisyo Kyake. Ngimba uswe twisakubombaga kiliku Pisiku lila? Ngimba kikuyaga kiliku. . . ?

⁴⁷ Linga Kyāla ikutupápo uswe ifīndu fyakubōmba, nukutupapo uswe ihéla, kangi ukutupela uswe kikolo ikikabi ukukīnda pāsi pa kumyānya, polelo Kyāla isakutulūlusyaga, iki uswe twābombile ni syēne. Nongwa ya fiki uswe tukutāga ihéla syītu pa findu ifi fitikwikutisya mma? Komma kwēne ku kikikolo, loli ikyo kisakuyaga kwa aligwēsa pamwenepamwene; ukufuma ku sumuni, ukubuka ku maelifu-elifu ga madola, aligwesa pamwenepamwene isakupīgwa.

⁴⁸ Akabalilo kako abāndu bikugogāna yumo nu nnīne: Une nabalile akapango itolo lululu, kūko abalumiana babili bikubōmba mu bugonelo bwa bufwīmi. Yumo ali na bāna bahāno, uyungī yula ali nabo babili. Kangi yumo mwa bene afīmbilisigwaga ukusosigwápo pambómbó. Kangi yumo mwa balumiana uyū ali na bana babili, pamo ali na bāna bahāno, alinkwipilika ukuti umwēne yo afūmbilwe ukuya pambómbó ukukīnda yula ali na bāna babili; kangi alinkubūka kukufwīma nu mwēne, kangi alinkuntūsulīla umwene mu nyuma.

⁴⁹ I héla, ulo lo luko lwa kikolo, ulo lo luko lwa kwīpilika, ulo lo luko lwa mbepo iyi yikulagīla abāndu.

⁵⁰ Polelo umwe mubagile ukuketa ubununu ubu u Bupāpīgwe ubupya bubagile ukuya. “Ugwe kufīmbilisigwa ukupāpīgwa kabubili.” Ikyēne kibagile ukuya. “Isaga kwa Une, kangi gulaga kisita héla.”

⁵¹ Ugwe ukabagila ukuyoba, “Une ngāli ni héla.” Ugwe utikufūmbwa i héla yiliyosa. Ikyēne kipēgigwe mwaitolo.

⁵² Uswe Bamerika tupubile ukuhōmba injila yitu kuli kilikyosa. Ubo bo buyobelo bwītu. “Uswe tukuhōmbela ifindu. Uswe tulinasyo ihéla.” Ukusopa panja amakalatasi ga dola ku fīsu ifīngi, na fyosa bo ifyo, ifi fyo filōndo. Ukwenda ukwīngila, ugwe kubabona abayāti bikwīsa mula, bosa mmayoya kangi banunu. Abamerika bikupakisya ku bēne. Ikīndu kila kyo bukabi bwakinyanyasi mmaso ga Kyāla. Kila kitisakūla injila yītu ku Mwanya. Lōli kilikyōsa mu Amerika, uswe tukufīmbilisigwa ukuhōmba injila yītu.

⁵³ Ugwe kubuka ku bulilofīndu, kangi ugwe kulya ifyakulya fyakunamayolo. Kangi linga ugwe utikubīka ihéla pa kigēmo, ukunhōnga undindwana umbombeli, lulipo ulukinya lukwīsa pa kisyo kila, ukufuma pakuhōmbigwa ni kampani iyi umwene ikubombeláko. Kangi ikyo kinunupo kiyége pabunini fīyo kalongo mwa mia yumo, pamo pabununūpo, ugwa kumelelīgwa

kwāko. Linga ugwe utikuhōnga, undindwana umbombeli yula isakukubonela pāsi ugwe ukuya gwe ngulupa ya pambili pamo uluko lumo lwa u—u mwīmi. Na pāpo, umwene ikwambilila i hēla syāke. Une ngwīnogōna ikyēne kyo kikosyasi, ukubōmba ikyēne. Une ngwīnogōna ikyēne kyo bulongi ububībi pa kikolo kyitu. Twālisibile, abandu abanunu, amabuyo amanunu, gakitikisyāga ikyo mma. Loli ikyene kyo kyosa kibukile mu mbepo yimo innywāmu.

⁵⁴ Une nabukaga pa bwendo, pa sitima. Kangi undindililakifigo... Une nali nako akakwama akanini nkiboko kimokyēne, ikikwama ikinywamupo mu kīngi, kangi akōmbo akamwelandefu pāsi pa lukongi lwāngu, kangi nēndāga. Undindililakifigo alinkusegelela, alinkuti, “Mbagile ukukupīmbila ikyene kuli ugwe?”

⁵⁵ Une ndinkuti, “O, une ne itolo ngubūka palapala pala ku sitima, nkulumba. Ndaga ugwe, fiyo kangi.” Itolo kifuki, o, amayādi malongo matatu.

⁵⁶ Umwēne alinkuti, “Une ngukyegaga ikyene,” kangi umwēne alinkukega akandu akanini kala nukukapīmba akēne mmwanya, alinkwenda nkyeni.

⁵⁷ Mulimosa, akabalilo kako umwēne ikwīsa pala, une ndinkwīnogōna lumo une... une namenye umwene ahōmbigwaga, loli une itolo nābagile ukumpa umwēne i—ukumpa umwēne sinda gwa dola. Umwene pamo ālinafyo mmaboko gake, ifyombo fyangu, kuli kifuki, tutigi, i miniti; kifuki kubutali bo kubumālikīsyo bwa nyumba iyi, kūko umwēne āyāgile i sitima. Une ndinkufyukila mmwanya pa sitima, tasi, kangi itolo ndinkufikila pasi nukukyaga ikyēne. Une ndinkumpa umwene sinda gwa dola.

Umwēne alinkuyoba, “Gulila i miniti!”

Une ndinkuti, “Ngimba ikyēne kyo fiki, nkulumba?”

Umwēne alinkuti, “Une mbīmbīle ifikwama fitatu kuli ugwe!”

Une ndinkuti, “Ena, nkulumba, uko ko kutalusya. Ngimba fiki, ngimba fiki ifi kitamīsyē?”

⁵⁸ Umwene alinkuti, “Ukumelēla kwangu ukunnini fiyo yo masenti malongo-mabili-na-mahano pa kikwamba. Ugwe kumeleligwa na une amasenti agāngi malongo-mabili-na-mahano.”

Muketile, ikyo kyo Kimerika, kilikyosa kikufimbilisigwa ukuhōmbigwa.

⁵⁹ Ugwe kubuka ukwitoga mu ligali lyako kangi unko iliyene ligwe nkibwīna, kangi ugwe kummwēga umunduyumo ukukukwābila ugwe pānja. Ugwe kinunupo itendekesya ukuhōmba, ’nongwa yakuti abene bikukumelelāga ugwe panongwa ya ikyene. Linga ugwangozi ikwīsa nukukwaga

ugwe, umwene isakukumelelaga ugwe *inyingi fiyo* pa mailo. Kangi linga umulimi, kahano-na-kana ukufuma mwa kalongo, ikusosya i trakitala lyake panja, ikyene kisakuyaga kibibipo ukukinga ikyo.

⁶⁰ Ugwe kufimbilisigwa ukuhomba kuli kilikyosa iki ugwe kuti kibombigwe. Kilikyosa kyo “Homba! Hela! Homba! Hela!”

⁶¹ Kangi napapo kyo kibwina ikinywamupo bule iki ubutulwanongwa bwakusopilemo ugwe nkati! Yo ywani abagile ukukusosyamo mu kibwina kya butulwanongwa? Loli Kyala ikukwega ugwe ukufuma ku kibwina kya butulwanongwa, kisita hela, kisita ntengo, akabalilo kako akayapo nayumo abagile ukukusosya ugwe panja.

⁶² Linga ugwe utikuhomba nuntengo panongwa ya kukwabigigwa na gwangozi, ugwe kwitugalaga nkibwina. Ugwe kufimbilisigwa ukuya ni hela pamo ugwe kusyala mula nkibwina.

⁶³ Loli ikibwina ikibibi fiyo ugwe gwayilemo, kyo iki mohesi akusopilemo ugwe, ikibwina kya butulwanongwa nu kusitakwitika. Kyala nubwigane isakukwaba ugwe ukusosya, kisita hela, kisita ntengo. Kangi pope ugwe gwalambalele nkibwina, itolo ukwinyafilania ubutulwanongwa, kangi komma nukukolela pa Mwene mma.

⁶⁴ Akabalilo kaho ugwe kwega ugwangozi panja, akabalilo kangi abene bikubika unyololo unywamu pamwanya nkati nkibwina, ukuniemba ilyene ukusyungutila ikyakung'anyilapo na fyosa bo ifyo, nukwanda ukukwaba. Kangi amaka ga ligali gakwanda ukukwaba, kangi i motala yikubuka kukubomba, nukukwabila ugwe panja.

⁶⁵ Akabalilo kaho Kyala ikukwaga ugwe nkibwina kya butulwanongwa, nukukupilika ugwe kukolela pa Mwene, Umwene ikutuma pasi unnyololo ugu gwaniembigwe ukusyungutila Kalvari, u lugano lwa Kyala, kangi ikutunga ugwe pa ndumbula yako, kangi ikubika a Maka ga Mbepo Mwikemo pala, ukwanda ukukwaba. Kangi ikyene kitikwegela ugwe nakimo. Kangi pope uswe twalambalele nkibwina panongwa yakuti uswe tukabagila ukuhomba ikyene ni nyambi syitu. Uswe Bamerika tukwinogona uswe tubagile ukuhomba ikyene ukufuma mu nyambi syitu, loli umwe mukabagila. Ikyene kyo kisita hela pamo kisita ntengo. Ugwe utikuhomba ikyene ku kipanga. Yeso ahombile ikyene pa Kalvari. Loli abandu bo bali ni soni panongwa ya Ilyene. Abene bikulonda Ilyene mu njila yabo. Kyala ali ni njila kuli ugwe ukwambilila Ilyene, kangi Ilyene lyo lyaitolo linga ugwe kwisakulyegaga Ilyene.

⁶⁶ Utubalilo twingi, akabalilo kaho abene bikukwababa ugwe panja pa kibwina, ugwe gwe ung'waligwe mosa, ugwe kufimbilisigwa ukubuka kula, ku kipatala. Kangi bo abene bakali ukwanda ukubomba pa ugwe, bo kakali na kandu

kamo kabōmbígwe pa ugwe, abēne bikulālusya, “Yo ywani ikuhombága untēngo? Linga uswe tukuyaga pakusona mōsa ifilōnda, linga uswe tukuyaga pakoneléla amafuta, nukukupapo isindano panongwa ya—panongwa yakukugāngúla ugwe ukufuma ku mwafi gwa ilopa, ngimba lo luko luki lwa insyulansi ugwe uli nayo?” Bo abēne bakabōmba akandu kamokēne, iyēne yikufimbilisígwa ukuya héla pa bukōnge.

⁶⁷ Lōli akabalilo kāko u Ntwa gwītu ikubīka unyololo Gwāke ugwa lugáno ukusyungutila indumbula yāko, nukukukwāba ugwe ukufuma nkibwīna, Umwēne ikubumbulusya indumbula yiliyōsa imbongotoke, ikusōsyāmo imbibi syōsya. Kangi untēngo gukubīkigwa mwa nyanja iyakwībwa, ukukūmbukiligwa kwa ugwe kangi mma. “Isaga, kisita héla pamo kisita ntēngo.” Kisita kupāsya ububibi mūmo ugwe utumulígwe mōsa, kali ugwe ukuyubulígwe nububibi bulebule, mūmo inyumba yāko yibōmbīle, pamo iki ugwe ubōmbīle, gukayapo untēngo ku kyēne. Umwēne ikubūmbulusya ukubabo kwa ndumbula, ikusōsyāmo isulumanio syōsa. “Umwene āfulasigwe panongwa ya ngilanio syitu, ākuyubuligwe panongwa ya butulwanongwa bwitu; ulufundo lwa lutengano lwitu lwāli pa Mwene; kangi ni fulale Syake uswe twābumbulusigwe.” Ikyene kyo kyosa kyaitolo.

⁶⁸ Kangi uswe tutisakwāmbilila Ikyēne, yo nongwa yakuti uswe tukulagiligwa ni mbepo isobi. Uswe tukulagiligwa ni mbepo ya kikolo, i mbepo ya kīsu, mbuyo bwa kulagiligwa nu Mbepo gwa Kyāla, Mbepo Mwīkēmo, uyu ukulōngosya uswe kangi ikutulungoléla uswe ku Bwānalōli bosa, kangi ikupela i Bāngéli lulalula.

⁶⁹ Akabalilo kamo aka kakīndilépo, une nāyobága kwa nsitakyala. Umwene alinkuti, “Inogona isya iki, Tata. Branham. Bōsa ubu ubutolwe bwa būmi, kangi ikindu kyēne uswe tuli nakyo, ukuti uswe tupokígwe, mo mu tusimbo tumo utwaiyolo utwa Kiyuda.”

⁷⁰ “O,” une ndinkuyoba, “nkulumba, ikyo kibagile ukuya kyōsa ugwe uli nakyo, lōli une ndinakyo ikindukimo ukukīndápo pa ikyo. Une ndinagwe Mbepo gwa Yula yūyo āsīmbīle Ilyēne, uyu ikusisimikisya Ilyēne nukulitēndéka Ilyēne ukuya lulalula, ulufingo lulilōsa.” Umwēne akāmenye akēgēlo ka kila.

⁷¹ Muketile, ugwe kufimbilisígwa ukwīsa nukūla kisita héla, ukūla kisita ntēngo. Ikyēne kitikwēga nakimo. Ikyēne kyaitolo kwa “aligwēsa iganile, unko umwēne ise.” Kyāla ikukwāba ugwe ukufuma ku kibwīna.

⁷² Ngati u nnyāmbáli ku kipata kikubilikígwa Kimogi. Umwēne āli nkibwīna, ukufuma mūnda mwa nna, na yu mōhési yūyo ālindemesye umwēne mmalundi gāke. Injila yāke ya būmi kwāli kusuma ubutululi ukufuma ku bāndu aba bakīsaniága. Kangi bo umwēne itūgésye pa kipata ulubunju lula, umwēne

ākētīle abalūmbilili babili bakipentekosti bikwisa. Kisita nu lutalama nalumo pa bēne, kabuno umwēne āyobile, “Siliva na sahabu une ngaya nayo nakamo.” Kangi ulutalama ko kapatu akanini ukukinda aka siliva. “Siliva na sahabu une ngaya nayo nakamo.”

⁷³ Une ngusakikisya u nnyāmbála inogonága ikindukimo bo iki. “Kukayapo nukufūmbwa ukwa kwēga ifinga yāngu.” Lumo umwēne āgelága ukukyūnga ihéla yakufwāna. Umwēne āli ni fyīnja malongo mana mbukusi, kangi lumo umwēne āgelága ukubūngania ihéla syakufwāna, abagānga babagile ukutēndekéla umwēne ifyakwigemekesya pa kwēnda fibili, ukwēndapo, kabuno, umwēne, mu tufundo twāke umwēne āli monywa. Kangi lumo umwēne afīmbilisigwága ukuya ni héla, ukulāmbalála pa mfōlo, bo abagānga bābagile ukumpa umwēne ubutuli. Kangi nalolilōli kukayapo nukufūmbwa ubwa umwēne ukwīnusya ifinga ku aba abalūmbilili bakipentekosti aba bākāli nako nakamo. U lusako, abēne i . . . bāli balondo fiyo, ulwakuti bābagilémo siku ukulwāga ulutalama ukufuma ku binitu bala.

⁷⁴ Lōli akabalilo kāko umwēne ākētīle nkisyo kyābo! Yumo unkeke kangi ukweluka nu bukeke; uyungi yula, nkāngāle kangi gwanginya; bo Yohani . . . bo Peteri na Yohani bābūkāga kulakula ku kipata. Umwēne ākibwēne ikindukimo mu nnyāmbala gwakikeke yula. Ko kuti, ukweluka kwāli panini kwīngipo ukukinda kwabwīla. Umwēne ākētīle pāsī pa nginya ni mbakisyo, isya lisuba lya mu Galilai ili lyalyōkīkye ikisyo kya undobanswi unkāngāle, bwālipo “ubusangalufu ubusitakuyoba, kangi iswīle nu lwīmiko.” Umwēne ākibwēne ikindukimo iki kyābonekága ukuya panini kikindāne.

⁷⁵ Umwe mumenye, kilipo ikindukimo ikya Kikristi, iki kikutēndéka abāndu ukuboneka bakindāne. Abēne bo bandu bamogi ukukinda nkisu kyōsa.

Kangi umwēne alinkwēga ifinga yāke nukuyikoleléla pānja.

⁷⁶ Kangi u ntumigwa Peteri, ukuya ya nkusi ukukinda, alinkuti, “Siliva na sahabu une ngaya nayo nakamo.” Mmasyu agāngi, “Une ngabagila ukukutūla ugwe nakalikōsa, ukūla ifyakwigēmekesya pakwēnda. Siliva na sahabu une ngaya nayo nakamo, lōli kuli iki une ndinakyo!” Umwēne āfumile kukūla ukufuma ku Mwēne yūyo āli nu lūki kangi īsangalufu isya bwāla bwa bupoki. Umwēne ālisile itolo, amasiku mabili pamo matatu bo kikāli kila, ukufuma ku Pentekosti, kūko ikindukimo kyābonīke.

⁷⁷ Kangi u nnyāmbála unkeke yula alinkwibuka nu nkulumba unywāmu “ameni” ku kyēne, nukukēta mu kisyo kyāke.

⁷⁸ Ngimba fyo fiki fyābonīke? Unnyololo gula ugwa kisa, ikibabilisi kya Mwēne yūyo āyobile, “Une nāli ni kibabilisi pa babine,” u Mbepo yulayula yula ālyēgile ubuyo mu ndūmbula ya ndobanswi ugwaiyolo yula. Umwēne alinkuyoba, “Linga

tukuyoba isya héla, une ngaya nayo nayimo, lōli une ndinakyo ikindukimo iki kisakwēga ubuyo bwāko kaelifu-elifu. Iki une ndinakyo!”

⁷⁹ Lilino kumbukilāga, Peteri āli nJuda, kangi abēne basiganile ihéla, mukipeligwa, lōli uNjuda uyu āpindwike. Komma, “Bo iki une ndinakyo, ngulisya une ugwe.”

⁸⁰ Lōli, “Bo iki une ndinakyo, ngukupapo une ugwe! Bo iki une ndinakyo! Une nganali nu lutalama lumu mu nyāmbi yāngu. Une ngābagile ukūla ikimoma kya nkati. Une ngābagile ukūla nakimo. Une ngaya nayo isumuni. Lōli linga ugwe ubagile ukwāmbilila ikyēne, bo iki une ndi nakyo, une nisakukupapo ugwe panongwa yakuti ikyēne kyāpegigwe kwa une.” Ikyo kyo iki uswe tukufūmbwa. “Bo iki une ndi nakyo, ngukupapo une ugwe.”

“Ngimba ugwe ulu nakyo fiki, nkulumba?”

⁸¹ “Une mfumile ku Mwēne yūyo ikūlisya ulupyu nu lūki, kisita ntēngo. Une ngupaga Ikyēne kwa ugwe. Ugwe utikumeleligwa kwa une nakimo panongwa ya Ikyēne. Linga ugwe ubagile ukwāmbilila Ikyēne, une nisakukupapo Ikyēne kwa ugwe. Komma bo yūyo uyu ābagile ukukumelēla, lōli bala bābo babagile ukupa.”

⁸² Panongwa yakuti, “Bo mwaitolo mūmo ugwe gwāmbilile, mwaitolo paga.” Ikyēne kilinkufimbilisigwa ukuya bulagili bwa Ntwa gwāke, itolo amasiku matatu kunyuma. “Buka nkīsu kyōsa, ukulumbilila Inongwainunu. Umwēne uyu ikwītika kangi ikōsigwa isakupokigwaga; kangi umwēne uyu atikwītika isakutāgigwāga. I fimanyilo ifi fisakukongāga abēne aba bikwītika: Mu Ngamu Yāngu abēne bisakusātisyāga imisyētāno; abēne bisakuyōbāga ni ndimi imbya; linga abēne bikunwa ifindu ifigogi, ikyēne kitisakubafulasya abēne; linga abēne bikupimba imiyoka, iyēne yitisa kubafulasya abēne. Bo mwaitolo mūmo umwe mwāmbilile, mwaitolo paga.” U nJuda yula alyānduligwe.

⁸³ Iki uswe tukufūmbwa mu Amerika ko kwānduka, ukwa Mbepo Mwīkēmo ukwēga ubuyo bwa nyīho syītu simo isyabwīputiputi. “Bo mwaitolo mūmo umwe mwāmbilile, mwaitolo paga.”

⁸⁴ “Bo iki une ndinakyo, ngukupapo une ugwe: Mu Ngamu ya Yeso Kristi ugwa Nazareti, sumuka kandi enda”; ulwītiko mu insitakubwāpuligwa i Ngamu ya Mpele! Fyōbēne umwēne alinkubūka ukunyēlanyēla nu kunyēla, kangi ukuntufya Kyāla!

⁸⁵ O, umwe mumenye ifindu ifikulumba, umwene lumu ālitūgésye pala ifyinja malongo mana, ikugela ukusyāga ihéla isyakufwāna ukwīyūlila mwēne ifyakwigemekesya pakwēnda, lōli umwēne alinkutoligwa ukubōmba ikyēne. Lōli mulamula mu buyo ubusitakwinogoneligwa ukukīnda, kangi akabalilo akasitakwinogoneligwa ukukīnda, kangi abāndu abasitakwinogoneligwa, abasitakufwāna, umwēne alinkukyāga

iki umwēne ālondaga. Une nhōbwike fiyo ukuti Kyāla ikubomba lulo.

⁸⁶ Mu kipāmba kya banini, abakōleligwe bīkēmo-babunguluka ikilo kimokyēne, une nakyāgile iki une nālōndāga, iki ihēla sikabagile ukūla. Mu kipāmba kya basitakusimba, basitakumanyila, abāndu abafwāla fyabulōndo, Abanegro, ukwanda itolo, panja kwīsilya mu nkatēmba akanini akaiyolo akapindusigwe, pa kipālo, une ndinkwāga u ntēngo, ibwe ilipala; akabalilo kāko untītu unkāngāle yula ālingētīle nkisyo kyāngu, kangī alinkuti, “Ngimba ugwe gwāmbilile Mbepo Mwikēmo ukufuma pāpo ugwe gwālītīke?” O, Ikyēne kyāli kindukimo iki une nākilōndāga. Une ngagūlilāga ukukyāga Ikyēne pakati pa bāndu bala, lōli abēne bāli nakyō iki une nāfūmbilwe.

⁸⁷ Aba U.N. umwīsyūgu, abēne bakabagīla ukwītīkīsyā iki uswe tuli nakyō, lōli ikyo kyo iki abēne bikufūmbwa. Khrushchev, bōsa ba bēne aba basyēle, bikufūmbwa Kristi, mu lōsyo lwa Mbepo Mwikēmo. Ikyēne kisakwāndula ubukētelo bwābo. Ikyēne kisakutēndēka abanyāmbāla, aba abēne bikubabēnga, ukuya bakūndwe. Ikyēne kisakusōsyāmo ubwīmi, kangī akabīni kangī ukulwāna; nukubīka ulugāno nu buhobofu, kangī ulutēngāno, ubununu ni kisa.

⁸⁸ Ena, mmabuyo amasita kwīnogonēligwa, utubalilo tumo kūko ugwe kukyāga iki ugwe kukilōndēsya.

⁸⁹ Ngimba abāna ba Israeli angali bapēle fiki (fyōsa ifyōmbo fya Igupti) akabalilo kāko imilomo gyābo gyōnekāga ililopa, akabalilo kāko ululimi lwābo lukulēmbēla ukufuma mu ndomo gyābo? Abēne bābagile ukupa u golidi aligwēsa uyu abēne bānyakīle ku Baigupti, panongwa ya kunwa kumokwēne kwa misi amatalalifu amanunu. Abalōngōsi bābo aba ndulangalanga bābalōngwīsye abēne ukufuma ku kitubwi ukubūka ku kitubwi, ukufuma ku kibwīna ukubūka ku nyībūko, lōli fyōsa fyāli fyūmu.

⁹⁰ Polelo pala palinkwīsa, kisita hēla pamo kisita ntēngo! I Lisyu lilinkuyoba ku nsololi nukuyoba, “Yoba ku lyālabwe,” ikīndu ikyūmu fiyo ndulangalanga, ikīndu kyakubutali fīyo ku mīsi. Pala ikyūmilwa kyabo kilikusimisigwa, kisita hēla pamo kisita ntēngo. “Yoba ku lyalabwe.” Komma hōmba ku lyālabwe, lolī, “yoba ku lyālabwe.”

⁹¹ Umwēne akāli yo Lyālabwe ikilo iki. Umwēne yo Lyālabwe nkīsu ikyābukatale. Linga ugwe uli pa bwēndo nkīsu kya bukatale, yoba ku Lyālabwe. Utikufimbilisigwa ukunhōmba Umwēne; yoba ku Mwēne. Kangī Umwēne yo butuli bulabula ubuyepo nkabalilo ka lutamio. Linga ugwe uli mbīne, yoba ku Lyālabwe. Linga ugwe uli mbīne-butulwanongwa, yoba ku Lyālabwe. Linga ugwe ukatēle, yoba ku Lyālabwe.

⁹² Muketile, icyēne kyābōnike ngati icyēne kyābagile ukuya palipōsa. . . Ikyēne kyābōnike ngati, linga gakayāpo na mīsi nagamo ukusuluka mmabuyo amanīni gala kūko syāliko inyībuko, gakābagile ukuyāko na mīsi nagāmo mmwānya nkyāmba kila kifuki ni lyālabwe. Kyala ikubōmba ifindu itolo munyuma ukukinda iki umūndu ikwīnogōna. I lyālabwe, ubuyo ubūmu ukukinda ndulangalanga, loli Umwēne ikuyoba, “Yoba ku Lyālabwe.”

⁹³ Umwīsyugu, abāndu bikusyōbigwa fīyo. Abēne bikwīnogōna linga abēne babagile ukubūka nukuyoba inyīputo syābo, ukunhōmba umpūti yumo ukuyoba inyīputo innini kuli abēne, ukuhōmba injila yābo ukukīndilīla. Linga abēne bisakuyēnga ikipānga ikinywāmu kimo kubuyobumo, kangī unnyāmbala unkabi yumo isakubahōmbela, ukukīndilīla ukwitūgāla nkinyonywo, ukuya nu munduyumo uyūngi ukummwīpūtila umwēne, umwēne ikwīnogōna ukuti ikyo kyēne. Kyāla atikulōnda ihéla syinu isyākinyanyāsi. Fyosa ifindu umwēne ikulōnda ko kwīyipa kangī ubūmi bwāko ukuyōba ku Mwēne. Kyāla akupele ugwe i héla, komma ukutāga isyēne pa findu ifi fitikwīkutisya mma. Tāga isyēne pa findu ifi fikwīkutisya. Lōli ukutwāla ukwīkutisya kwānaloli, ugwe ukabagila ukukwāga ukwēne mpaka ugwe kuyoba ku Lyālabwe.

⁹⁴ Umwēne ātwele pānja amīsi amapa-bumi, kisita héla pamo kisita ntēngo. Kangī abēne bānwile, kangī ingamila syabo silinkunwa, kangī abana babo balinkunwa, kangī iyene yikāli yo nyībuko yikwēndelēla ndulangalanga.

⁹⁵ Kangī mo mūmo Umwēne yo Lyālabwe umwīsyugu, nkīsu icyābukatale iki, panongwa ya bāndu aba bikupyūtigwa. “Aligwēsa uyu ikummwītika Umwene atisakupyūtigwāga mma, loli ikuyaga nu Būmi bwa Bwīlanabwila.”

⁹⁶ Ketesya. Ikilo kilikyosa, abēne bakāfimbilisigwaga ukuswiga isya nkati. Unkati gwābo gwatwāligwe ku bēne, ikilo kilikyōsa, nubupūpwano.

⁹⁷ Uswe tukubūka umwīsyugu ukwākwēga ikimoma kya nkati. Linga ugwe gwe nsumasuma, kangī ugwe kwenda kubwa kuno ku liluka, nukuyoba, “Une ngunyonywa ikimoma kya nkati.”

⁹⁸ Umwene ikuyobaga, “Nnangisya une, tasi, sinda gwa sinda gwako. Une ngufimbilisigwa ukuya na masenti malongo mabili na mahano kuli kimoma iki kya nkati.”

⁹⁹ Kangī ngimba ugwe fyo fiki uli nakyo akabalilo kako ugwe kugwaga ugwene? Iki kyo kili panini panjapo pa lupakisyo, loli ugwe uli nakyo ikypasi fiyo iki ingano yibagile ukutwala. Abene bikwega gosa a—a mafitamini ukusosyako ku kyene, amakandi gosa, nukupa ikyene ku ngulube. Ukufulugania ikipambo kya litapa ili likukolelela amakandi palikimo, nukusefa ikyene ukusosyamo, nukutendeka ikimoma kya nkati, kitendekigwe na maboko amafite, agakinyanyasi, utubalilo

twingi. Umwe muketile ifi umwe mukufyaga mu nkati gwinu, utubalilo tumo, ifibugutila fya nywili, kangsi ifindu fyabulogwe, nu tupatu twa mbeba, na filifyosa ifingi ifi fikugwilamo mu fyakupiyila fila. Abandu abonangi ni mbungo syabulogwe, na filifyosa, ukufulugania mu kyene. Linga ugwe gwaketile ugwe gukutendekigwa, ugwe angali utikulya nukulya ugwe. Kangsi, loli, ugwe kuhomba amasenti gako malongo-mabili-na-mahano kisita apa ugwe utikwega ugwe.

¹⁰⁰ Kangsi Kyala abalysesye abēne ikilo kilikyosa, nu nkati gutendekigwe na maboko ga Bandumi; kisita hela, kisita ntengo. Kangsi, umwisyugu, u nkati gula gwimililaga Kristi, u Bumi bwamwambepo, bwalisile pasi ukufuma ku Mwanja, ukupa u Bumi Bwake.

¹⁰¹ Kangsi Kyala ikupa abana Bake, ilisiku lililyosa, ubwisibile ubupya. Umwe mukukumbukila, linga abene bakyungile unkati ukukilania, ugwe gwafubaga.

¹⁰² Ugwe kupilika yumo ikuyoba isya, “Mulimosa, une ndinako... Une ngukubulaga ugwe. Une ndi gwa Luteri. Une ndi gwa Presbeteri, Baptisti. Une ndi gwa Pentekosti,” ikyo kyo itolo kyaiyolo kitendekigwa-na-maboko kimoma kya nkati. Ikyo kyo kyene iki kiliko ku kyene, itolo ukuya kyakinyanyasi, kangsi kitendekigwe mosa na maboko ga bandu.

¹⁰³ Loli akabalilo kako ugwe kupilika ubwisibile bwa buketi, bupupwano, “Ulubunju ulu, ndwiputo, u Mbepo Mwikemo alinyosisye une nubupya,” o, nkundwe, ikyo kyo Kyakulya kya Bandumi. Umwene ikuswila abene nubupya, ilisiku lililyosa, ukufuma ku Mwanja.

Akafula ka sayo uswe tukufumbwa;
Indonye sya kisa ukusyungutila uswe sikugwa,
Loli panongwa ya kafula uswe tukulamba.

¹⁰⁴ O, ena, tuma pasi ukufuma ku Mwanja, nubupya, Ntwa, Kristi u Nkati gwa Bumi. Taga Ugwe mu ndumbula yangu, kangsi unko une nikyele u Kuyapo Kwake ukukulamba.

¹⁰⁵ Naloli, abene bali bakupalisya. Abene bali bakundagisya. Kangsi unnyambala pamo unkikulu aligwesa uyu apapigwe mwa Mbepo gwa Kyala, kangsi ikwambilila u Mbepo Mwikemo, isakuyaga gwakupalisya. Kisita kupasya kilikyosa iki kikuboneka, ugwe kwisakuyaga gwakundagisya.

¹⁰⁶ Ngati u nnini, undumiana umfwamaso mmwanja mfyamba, unnini Benny, umwene apapigwe. Kifuki imyēsi lwēle mbukusi, isokela yikwanda ukukula pamwanja pa fisige fyake. Abapapi baka bali balondo. Abene bitugalaga pa lubafu lwa kyamba ikyamfu ikyaiyolo. Kangsi abene bamenye ukuti ubupanje bula bwabagile ukuponesya ifisige fya Benny unnini, ukuti umwene abagile ukuketa. Umwene āli ndumiana lilino ugwa kifuki ifyinja kalongo na fibili mbukusi. Abapāpi bāke bakābagile itolo

ukusyāga isyakufwāna ukugwāga unkati ni nyāma pa kyīnja. Abēne balinkutologwa ukufwānisya ubupānje.

¹⁰⁷ Abapamani bōsa, palikimo, bālimbwēne Benny unnīni ikugela ukusāla na bānīke abanini panja pala, mfwamaso. Umwēne alinkutologwa ukuketa iki umwēne ābōmbāga. Abēne balinkwīpilika ubusulumanie. Kangi aligwesa pamwene, ikyīnja kila, balinkubīka mula akayabo akapalubafu aka fibyālīgwa. Abēne balinkusukulika ukōngelelāpo panini ndumu. Kangi akabalilo kāko ifibyālīgwa fyālyūlisīgwe nkabalilo ka kulakatika kwa māni, abēne balinkwēga i hēla nukumbīka u Benny unnīni pa sitima, nukuntuma umwēne ku ngānga.

¹⁰⁸ Abēne balinkubōmba ubupānje nubupōnjoli. Kangi akabalilo kāko umwēne āgomokile, bōsa abapalamani balinkwibūngānia ukusyūngutīla akabalilo kāko unnini Benny ikāga i sitima. Agāke amanini, amāso gikumulika nubwēlu. Umwēne alinkwānda ukuywēga nukukūta, bo umwēne ikukēta pa fisyo fyābo.

¹⁰⁹ Yumo mwa bakyūnga-hela ba sitima alinkuti, “Mwanundumiana, ngimba go ntēngonki ikyēne kyālyēgile ugwe panongwa ya bupānje bula?”

¹¹⁰ Umwēne alinkuti, “Nkulumba, une ngamanya iki kyālyēgile abāndu aba. Lōli une nsangalwīke fiyo ukuti une mbagile ukufibona ifisyo fyābo, aba bāhōmbīle untēngo.”

¹¹¹ Iyo yo njila iyi uswe tukwīpilīka. Une ngamanya iki Ikyēne kyālyēgile Kyāla. Une mmenye Umwēne ālimbēle une ikinunu ukukīnda Umwēne ālinakyo, u Mwanundumiana Gwāke. Lōli une ndi gwakupālisya fiyo ukuya nu buketelo bwamwambepo ubu, ukuti une mbagile ukukēta nkisyo Kyāke nukumanya ukuti Umwēne āfwīlīle kuli une. Une ngamanya iki Ikyēne kyālyēgile Umwēne. Uswe tukuya ni njila nayimo iyakusakikisya ugwēne. U ntēngo go nnywamu ukukīndilīla. Une ngābagile ukubabūla unwe mūmo ikyēne kiyīlīle. Lōli une ndi gwakupālisya. Une ngundagīsyā, ukuti, napāpo une nāli akabalilo kamo mfwamaso, une mbagile ukukēta lilino.

¹¹² Une ndigwakundagīsyā ukuti akabalilo kāko Mayo Brothers bālimbūlīle une akabalilo kāngu kāfwēne, akabalilo kāko abagānga bālimbūlīle une ukuti une ngabagile ukuya mūmi kangi mma, ifyīnja malongo-mabili-na-fihano ifi fikīndilēpo, une ndi mūmi umwīsyūgu. Une ngamanya iki ikyēne kyālyēgile Kyāla, lōli une ndigwakupālisya une ndi mūmi.

¹¹³ Akabalilo kamo une nāli ntulwanongwa, mbinyīgwe mbutulwanongwa, nu kubaba kwa ndūmbūla, ngutīla ubufwe. Lōli, umwīsyūgu, ubufwe bo bupōnjōli bwāngu. Aleluya! Ikyene kibagile itolo ukundwāla une mu Kuyapo kwa Umwene uyu une nunganile, ukuti une mbagile ukukēta pa kisyo Kyāke. Umwēne ālyāndwīle i kīndu, ukwisila mu bupānje, Umwēne ālyēgile

indũmbula yāngu nukuyipela iyēne mbupya. Une mmenye ikindukimo kyābonike kwa une.

114 Mu kalatasi nkabalilo ka kulakatika kwa māni nkyĩnja, mu Minnesota, ālipo undumiana unnĩni uyu ālyēgile injinga yāke nukubũka ku kipānga ulubunju lumo, ku sukulu ya Pandungu. Uyungi unnyambala unkeke mbupalamani, umwēne akāli ni mbombo nayimo ni sukulu ya Pandungu, umwēne alinkummwēgēla umwĩnake undĩndwāna nukubũka ukusala pa matalala. Kangi u nnyāmbāla āli nnyāmbāla unkulano, kangi umwēne alinkufika mu matalala amasekele nukugwĩla nkati. Umwēne ātalile ālinsekile undumiana unnĩni ulubunju lula bo umwēne ābũkāga ukusuluka pa nsebwe, ālimbũlile undĩndwāna-mwĩnake, alinkuti, “Kila kyo kipāmba kya bũmilisi bikubũka kula ku kipānga kila.” Kangi akabalilo kāko umwēne āgwile ukukindilila amatalala, undĩndwāna-mwĩnake āli kubutali ukufuma ku mwēne. Umwēne āli mpepe; umwēne alinkupona. Lōli akabalilo kāko umwēne unnyāmbala ikwēlēla pamwanya nukubũka ingongi syāke pa matalala, umwēne alinkusililika, kangi alinkwitulika pamwanya pa matalala.

115 Undĩndwāna-mwĩnake alinkugela ukufikila ku mwēne, lōli umwēne āli nsito fiyo, umwēne ābagile ukwĩngila mu matalala. Umwēne alinkukūtũla ku mwēne, “Gomokela nyuma! Gomokela nyuma! Ugwe kwisa itolo ukugwĩla nkati, kangi uswe twisa babili-bosa twisakumilwa.” Umwēne alinkukũta, umwe alinkulũla, kangi nakimo ikyākuntũla umwēne.

116 Bo kakĩndilēpo akabalilo kanini, pamwanya pa kām̄ba, kakwisa akanjĩnga kanini, kakufiga, undumiāna unnini ni Bāngēli mu ngwāpa yāke. Umwēne āpilike ingũto, kangi umwēne alinkubopesya injĩnga yāke innĩni. Alinkulāmbalika i Bāngēli lyāke pāsĩ, nukubōpa pānja pa litalala. Alinkwafula pa lwanda lwake ulunini, ni myenda gyake iminunu afwele, mpaka umwene alinkulukola ulukōngi lwa nnyāmbāla yula, kangi alinkũmilisya ukunkwāba umwēne ukungomokesya umwēne nkati, mpaka umwēne alinkusōsyāmo umwēne mu litalala. Alinkubōpa panja nukubilikila iligali. Abēne alinkubilikila i ambulasi nukumfikisya umwēne ku kipatala.

117 Bo umwēne ābũkile nukuhōmba i ambulasi, ukuhōmba abagānga panongwa ya sindano sya filaso ni fĩndu isi umwēne afimbilisigwāgwa ukulasigwa, umwēne ālisile ku ndumiana unnĩni yula. Umwene alinkuti, “Mwanundumiana, ngimba une ngumeleligwa ilinga na ugwe?”

Umwene alinkuyoba, “Nakimo.”

118 Umwēne alinkuti, “Une ngumeleligwa na ugwe ubũmi bwāngu.” Inogona isya ikyēne. Ihēla syātoligwe ukuhōmbēla ikyēne. Ubwēne bwāli bũmi bwāke.

119 Iyo yo njila uswe tubagile ukwĩpilika kwa Kyāla. Komma ukũla injila yĩtu ukukindilila ni kindukimo; lōli uswe

tukumeleligwa na Kyāla ubūmi bwītu, kabuno uswe twāfwāga kangī twāmilwāga nkibwīna kya butulwanongwa. Kyāla āsopile ingōngi Syāke nu nselekesye ukusyūngutīla une.

Une nībilāga mbusolofu mbōnangi,
 Kubutali ku kiloboko kyalutēngāno,
 Mfītīle nubusolofu fiyo nkati,
 Ngwībīla ukufubuka kangī mma;
 Lōli u Fūndi gwa sūmbi
 Āpilike ingūto yāngu imfūmbwāno,
 Ukufuma ku mīsi alinkufyūsya une,
 Lilino mbonile une.

¹²⁰ Une ngumeleligwa ku Mwēne u būmi bwāngu. Ugwe kumeleligwa ku Mwēne ubūmi bwāko. Ugwe kumeleligwa ku Mwēne u būmi bwāko, ukumbōmbēla Umwēne; komma ukupa ubwēne, ukwēndendeka nukwītūfyā isya kipānga kipāgūke kyāko; komma ukubūka palipōsa nukulōnda-ubusōbi mu bāngi; lōli ukugela ukubōmbēla nukupoka abāngi, kangī ukutwāla abēne ku bumanyi bwa Ntwa Yeso Kristi.

¹²¹ U mwānundumiana unsōbi. Mu kwīgāla, une mbagile ukuyoba iki. Akabalilo kāko umwēne ātāgēnie bōsa ubwitugalilo bwāke, ubwitūgalilo bwa tāta gwāke, nu bwitugalilo ubwalusāmbuko, kangī akabalilo kāko umwēne āgomokelāga ku kāya. . .Umwēne ālambalalāga nkibaga kya ngulube, kangī umwēne ikwīsa kukusyāgānia. Kangī umwēne alinkuti, “Bo balinga abāmbōmbo abahombigwe, u tāta gwāngu ali nabo, uyu alinafyo ifyakufwāna nukusyālāko, kangī apa une ngufwa, kuli ubususilwa.” Bule linga umwēne āgelile ukuyoba, “Nguswīga linga une ndi ni hela simo une nābagile ukunhōmba tāta ukungomokesya (iki une ndāgēnie mu kubopabopa) nakyō?” Lōli umwēne āmenye akayīlo ka tāta gwāke, kangī umwēne alinkuyoba, “Une ngusumukāga nukubūka kwa tāta.”

¹²² U gwīse akāyobilēmo siku, “Gūlila tāsi, mwanundumiāna! Ngimba ugwe kutwāla kangī ihela syāngu?” Umma. Umwēne akālinhōmbisyēmo siku umwēne panongwa ya mbībi syāke. Umwēne āli nhobofu ukuti umwēne āgomokelāga. Umwēne āli nhobofu ukuti umwēne ālisīle ku kusyāgānia mwēne, panongwa yakuti umwēne āli mwanundumiāna gwāke. Umwēne āli mwāna gwāke mwēne. Umwēne āli nhobofu umwēne āli pa nsebwe gwāke ku kāya. Lilino, umwēne akālitikisye imbībi syāke mma, lōli umwēne āli nhobofu umwēne ālisīle ukusyāgānia mwēne nukuyoba, “Une nsobīle pankyeni pa Kyāla, kangī pankyēni pa tāta gwāngu. Une nisakusumukāga nukubūka ku mwēne.”

¹²³ Kangī akabalilo kāko umwēne ālimbwēne umwēne, pabutali, umwēne alinkubopa ku mwēne nukumfipa umwēne. Kangī umwēne alinkuyoba, “Goga ingwāta iyamafuta,” kisita hēla. “Twāla unselekesye unkīnde,” kisita hēla. “Twāla ulusambo,” kisita hēla, “bīka ulwēne pa lōbe lwāke. Unko

uswe tulye, tunwe, kangi tuyege basangalufu, panongwa yakuti uyu mwanundumiána gwāngu āsobile kangi yo lilino āgígwe. Umwene āli mfwe, kangi umwēne ali nu būmi kāngi. Unko tuyege basāngalufu ukufwana ni ikyene.”

¹²⁴ Ndi yoba iki, bīnāngu, ukwīgāla. Ikīndu kyēne iki kikwikutīsyā, ifīndu fyēne ifyanaloli ifi filiko, ifīndu fyēne ifinunu ifi filiko, fikabagīla ukūlīgwa ni hēla. Ifyēne fyo fikūngīlwa fyaitolo ifya Kyāla, ukwīsīla mwa Yeso Kristi: ubupoki bwa moyo; ubusangalufu. Isaga nukulya, kangi yaga bikutīsīgwe.

Nongwa ya fiki ugwe kutāga i hēla kuli iki kikayā nkati? kangi ukusukulika kwāko kuli iki kitikwikutīsya mma? pilikīsya kifuki kwa une, kangi lyaga...kila iki kyo kinunu, kangi unko umoyo gwāko gwīkyēlēge gwēne mu butupano.

Tega imbulukutu syāko, kangi isaga kwa une: pilika, kangi umoyo gwāko gwisakuyaga mūmi; kangi Une nisa kutēdeka ulwitikano ulusitakumalika na ugwe, fyōpe fi fisa ifisisimikīsige ifya Davidi.

¹²⁵ Ifīndu fyōsa ifi fitikumalika, ifīndu fyōsa ifi fyo finunu, ifīndu fyōsa ifi fyo fisangalusyi, ifīndu fyōsa ifi fyo Fyāsyēpwa, fyo fyaitolo, kangi fitikwēgēla ugwe nakimo. Ku bumalikisyo kwa busīmbe bwa Būku uyu, ikyēne kyāyobile, “Aligwēsa uyu īganile, unko umwēne īse nukunwa ukufuma ku Mīsi ga nyībuko sya Būmi, mwaitolo,” kisita hēla, kisita ntēngo. Nongwa ya fiki ugwe kutāga ihēla syāko kuli iki kitikwikutīsya mma, kangi nukuleka ifīndu fyānalōlilōli ifi nalōli fikwikutīsya, fyaitolo, fibūkége kisitakukyūngīgwa na gwīmwēne?

Unko uswe twipute.

¹²⁶ Bo umwe muli mu kimyemye kangi ndwīputo, balipo, nkiyumba iki, ulubunju ulu, bala bābo bakanwa ukufuma ku Nyībūko, aba ifinyonywo fya kīsu fikāli fili mbūmi bwāko, kangi umwe mukulōnda ukwandula ubuyo bwīnu bwakunwēla, ulubunju ulu, pamo akatēdekelo ka hēla syinu? Ugwe kulōnda ukwīsa nukūla ukufuma kwa Kyāla, (kisita hēla, kisita ntēngo), ulūki nu lupyu, isangaluko isya bwālwa bwa mafīlu? Ngimba ubagīle ukufyūsya ikiboko kyāko, yoba, “Ngumbukilaga une, Nkundwe Branham, bo ugwe kwīpūta?” Kyāla akusaye ugwe, nkulumba. Kyāla akusaye ugwe, nkulumba. Kyāla akusaye ugwe, kalumbu. Ngimba balipo abangi aba babagīle ukuyoba, “Ngumbukilaga une, Nkundwe Branham, bo ugwe kwīpūta?”

¹²⁷ Bamo mwa umwe bāndu bakeke, ena, aba batāgēnie ubwitūgale bwīnu. I—i—i sala u māma yula ēgīle ndwīpūto kuli ugwe, kangi tāta gwāko, ukumanyisya kōsa uku abēne bakubōmbīle ugwe, kangi pōpe ugwe upīkile ikyēne, ukupilikisya ku lūhého lwa mōhési. Lilino ugwe kunyonywa ubwimbilo bwa kīsu, ifīndu fya kīsu. Kangi ugwe kwīsa

kwa gwímwéne, ngati u nsobi nkibaga kya ngulube. Ngimba ugwe ubagile ukufyúsyá ikiboko kyáko, kalumbu, nkundwe, kangi yoba, “Kyála, ngumbukilága une. Ndwála une kwa nímwéne, ulubunju ulu, unko une nise ku nyumba ya Tata””? Ikyéne kitikumelélígwa ugwe na kandu nakamo. Umwéne ikukugúlila ugwe. Kisita kupásya iki ugwe ubómbíle, “Palema nalinga imbibi syako siyege ngesefu, isyene sisakuyaga nyelu bo matalala; ngesefu bo malesi, isyene sikuyaga nyelufu bo masapa.” Ngimba bala mu Kuyapo kwa Bunyakyála, aba babagile ukufyúsyá ikiboko kyábo?

¹²⁸ Bala bábo babine kangi bafúmbwe, yoba, “Une—une nágwile nkibwína. Sétáno a—a bómbíle ububibi kwa une. Umwéne álindemesye une nukumbela une ukuya mbine, pamo ikindukimo. Une ngunyonywa, ulubunju ulu, unnyololo gwa Kyála ugwa lwítiko ukwíngíla mu ndúmbula yángu, ulu lwisakundúsága une mmwanya ukufuma nkibwína, bo yu nnyámbala ku kipata iki kyabilikigwága Kimogi.” Fyúsyá ifiboko fyínu. Kyála abasaye umwe, aligwesa.

¹²⁹ Ntwa, une ngutwála kwa Ugwe, isala iyi, bala bábo bafyúsísyé amaboko gábo, panongwa ya kuhobokeligwa kwa mbíbi syábo. Ugwe gwe Kyála, kangi Kyála mwéne. Palapala pápa abéne bítúgésye lilino, ko kúko Ugwe gwáyobile ku béne. Uko ko kúko Ugwe gwabasóngile abéne ukuti abéne báli basobi, akabalilo kako i Lisyu libwágile ubuyo Bwake, kangi u Mbepo Mwikémo alinkwanda ukuyoba, nukuyoba, “Ugwe gwe nsobi. Syumbutuka, kangi isaga kángi kwa Kyála Táta.” Kangi abéne báfyúsísyé amaboko gábo, ukunángísyá ukuti abéne bálóndága ukusókamo nkibága iki ikya kisu, ukwísa ku nyumba ya Táta, kúko fíngi filiko, kúko abéne batisakufimbilisigwága ukutwála nakamo. Bo umwáti ayobile kanunu, “Nakimo mfiboko fyángu une ngutwála, itolo ku kipíngíka Kyáko une ngwibanílila.” Abéne báli isaga, nubutofu, nulwiyúfyo, kangi yaga nsobi, nukwiyípa imyúmi gyábo. Kangi Ugwe kwisakutwálága pánja unselekesye unnunu ukukínda; kangi ulusámbo, nukubíka pa nyóbe syábo; nukubaswála abéne na Manna ga Kang’osi ungoígwe. Pága ikyéne, Ntwa.

¹³⁰ Balipo aba babine na bonywa aba babine. Abene bo bafúmbwe. Sétáno abasopile abéne nkibwína, kisita kwílámwa, yikayapo i héla ya bupanje. Kisita kwílámwa, lumo, bíngi ba abéne bātólígwe ukupánjígwa. Lumo ungánga átolígwe ukusósyápo ikiténdéko, nalinga pópe umwéne álimo siku ni héla nyíngi fiyo. Lóli Ugwe gwe Kyála. Kangi une ngusuma ukuti isala yiyiyi iyi, pási pa bupake bwa Mbepo Mwikémo bwítúgésye bulipo lilino, ukuti Ugwe kwisakubúmbulusyága aligwésa gwa béne. Abéne bali búmbulusigwága, ukufuma ku ntu gwábo ukufika ku malundi gábo, palipósa.

¹³¹ Linga abéne bali kisitabuhobofu; ubupoki bwábo, abéne bakabagile ukwíkyéla ikyéne kangi umma. Bo Davidi áyobile,

ugwa iyolo, “Gomokesya ubuhobofu bwa bupoki bwāngu.” Abēne bali ambililāga ubuhobofu nu busangulufu, panongwa ya busulumanie nu bukatale, kabuno Ugwe gwe Lyālabwe nkīsu ikyābukatale. Ugwe gwe kiponesyo nkabalilo ka mbelo. Akabalilo kāko u mōhēsi ikusopa ububine bulibōsa na misīnga ku bēne, Ugwe kiponesyo nkabalilo ka mbelo. Kiliyaga ikyene, umwīsyugu, Kyāla, kabuno uswe tukusuma ikyēne mu Ngamu ya Yeso. Amenī.

Nubutofu kangi nubutenenefu, Yeso
 ikubilikila,
 Ikubilikila kuli ugwe, kangi kuli une
 Palema nalinga uswe tōnēnge, Umwēne āli ni
 kisa nubuhobokelo,
 Lubokelo kwa ugwe kangi kwa une.
 Isaga kukāya . . .

¹³² Lilino, linga ugwe kunyonywa, isaga pamwanya ku kigemo nukufugama pāsi, uswe tubagile ukukwīputīla ugwe, ukukupaka ugwe, kalikōsa aka uswe tubagile ukubōmba. Ugwe gwe gwākwāmbililigwa.

. . . bakatale, isaga kukāya;
 Nukugūlila, nubutenenefu, Yeso ikubilikila,
 Ukubilikila, O monangi, isaga kukāya!

¹³³ Ngimba ugwe unganile Umwēne? Teddy, ngimba ugwe ubagile ukutupa uswe ulusambo, “Une nunganile Umwene, Une nunganile Umwene panongwa yakuti Umwene tāsi alinganile une.” Ngimba ugwe gwābagile ukulwāga ulo?

¹³⁴ Unko uswe twīmbe ulwēne ku lwīmiko Lwāko, bo uswe tukāli ukusanusya ulubātiko lwa bumbombelo, itolo akabalilo. Ulu lo lutūfyo. I Ndumi yikīndīle pānja. Une ne nsangalwīke fiyo ukuti umwe mwāmbilile Iyēne. Ngusuma ukuti Iyēne yisakubōmba kwa umwe ikinunu, kabuno ikyēne kyābōmbile kwa une ikinunu ukuyoba Iyēne. Une ngusuma ukuti ubupake bulabula ubu bwapēgīgwe kwa une, ukuyoba Iyēne kwa umwe, umwe mukwāmbilila Iyēne mbupake bulabula Iyēne yātumīgwe. Untwa alisayaga Iyēne ku ndumbula yāko. Umma ndaga.

Une nunganile Umwene,

Lilino itolo igala amāso ginu, bo uswe tukwīmba. Fyūsya amaboko gītu.

. . . Une nunganile Umwene
 Panongwa yakuti Umwene ālinganīle une
 Nukūla ubupoki bwāngu
 Pa mpiki gwa Kalvari.

¹³⁵ Lilino unko uswe itolo twīnamīsye imitu gyītu, ukung’ungu’sya ulwēne. Ugwe unganile Umwene? Ngimba Umwene akaya gwabwanaloli ku ndumbula yako? Ngimba kikayako ikindukimo kya Umwene, iki kyo itolo kyanaloliloli

fiyo? Une nunganile Umwēne panongwa yakuti Umwēne ātalile ālinganile une, āsopile pānja ulugoye lwa Būmi ukufuma ku Kalvari, ngolekīgwe Ikyēne pa ndūmbula yāngu.

¹³⁶ Komma ukwībwa, Nkundwe Drummond isakulūmbililāga kwa uswe ikilo iki, ikilo kya mugonelo. Linga ugwe kungana u Ntwa, isaga kuno kangī lyaga umugonelo na uswe. U Ntwa iganege, une nguyaga apa na umwe. Uyo yo mwanundumiana-muko gwa Nkundwe Tony Zabel; Nkundwe Thom ukufuma ku Afrika; umwanundumiana gwāke, undumiana ununu; naloliloli nnuu, Nkristi nkafu, nnuu ndumbilili nnīni.

Panongwa yakuti Umwene alinganile une
Nukūla ubupoki bwāngu
Pa mpiki gwa Kalvari.

¹³⁷ Akabalilo kāko uswe twinamīsyē imitu gyītu lilino, bo ipiano yisakukīndililāga.

¹³⁸ Ntwa Yeso, uswe tukwītēndekesya ukwīngīla mbubōmbelo ubūngi, Ntwa. Uswe tukupālisya Ugwe panongwa ya Mbepo Mwīkēmo uyu āyobile ku ndumbula syītu. Kangi uswe twe basangalufu, Ntwa, ukuti Ugwe gwaabombile iki kuli uswe. Kangi i Lisyu Lyāko lilingagomokelaga kwa Ugwe kisitakāndu, lōli Ilyēne lilifwānisyaāga kila kīkyo Ilyēne lyālōndeligwāga ukubōmba. Lilisyālāga Ilyēne mu ndūmbula syītu, ukumanya ukuti fyōsa ifindu fyānalōli kangī ifindu ifisitakumalika fikwīsa ukufuma kwa Kyāla, kisita hēla, kisita ntēngo. Nongwa ya fiku uswe twabagilāga ukusukulika polelo panongwa ya fīndu, nukutēndēka ikyēne ukuya kīndu kya bumi-nu-bufwe, panongwa ya findu ifi fisakupyūtīgwa? Unko uswe tusukulikege ukōngolelāpo, Ntwa, panongwa ya fīndu ifi fitisakupyūtīgwa, ifi fikaya nu ntēngo. Untēngo go guhōmbīgwe gwaitolo, kangī ukwāmbilila kwa kulagila, “Aligwēsa isakwīganāga, unko umwēne isege.”

¹³⁹ Sayaga ikiyabo ikyākukīndilila ikya bubōmbelo ubu. Pāga ikyēne, Ntwa. Kangi aganāga na uswe ikilo iki. Saya ububōmbēlo bwalōsyō. Apēne paliyaga ukōnelēla pānja ukukulumba. Abāndu aba bali, aba bisakōsīgwa mu Ngamu ya Gwāke unganigwa u Mwanundumiana, u Ntwa Yeso, abēne bali isusigwāga nu Mbepo Mwīkēmo. Abāndu aba, bābo bafyūsīsyē ifiboko fyābo, ukupīnduka, ulubunju ulu, isya mbībi syābo, abēne bali isaga, bali isaga mu myenda gyalōsyō, nukubūka nkitubwi, kangī ukusisimikisya ku kīsu ukuti abēne bahobokelīgwe isya mbībi syābo. Kangi abēne bikōsīgwa, ukuti abēne bayege bafyūlīgwe ukufuma mwa būku. Pāga ikyēne, Ntwa.

¹⁴⁰ Yaga nu Nkundwe Drummond ikilo iki bo umwēne ikutwāla i ndumi, ukupupwa ukufuma ku Kikota. Mpake umwēne nu Mbepo Mwīkēmo. Kangi yaga na uswe bo uswe tukulya umugonelo. Indūmbula syītu siliyaga nswepano kangī

ndenenefu, apene palingaya nu kubwapuligwa nakumo mwa uswe. I Lilopa Iya Yeso lilisukága uswe ukufuma ku mbíbi syósa. Pàga ikyēne, Ntwa. Kyūngága ububine ukufuma pakati pītu, kangi tupapo uswe ubuhobofu kangi ulutēngáno. Ukwīsilá mwa Yeso Kristi uswe tukusuma ikyēne. Ameni.

Une nunganile . . .

¹⁴¹ Ngimba ugwe unganile Umwēne? Lilino fyusya amaboko ginu ku Mwēne.

Une nunganile Umwēne

Panongwa yakuti . . .

Lilino fikilaga kula nukuponia amaboko nu munduyumo kifuki na ugwe.


. . .ikyākwánda . . .(Russell, une nunganile Umwēne. Linga une ngufwa umwīsyúgu, une nunganile Umwēne.)

Kangi ālyūlīle . . .

Uko ko kotalusya, fikilaga itolo ukusyungutila nukufugama pasi.

. . .ubupoki

Pa mpiki gwa Kalvari . . .

Syósa silikanunu, Nkundwe Neville, ni lisyu lyāke. Umma ndaga. 

59-0802 Kisita Héla Pamo Kisita Ntēngo
Kitembe Kya Branham
Jeffersonville, Indiana U.S.A.

KYANGONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org